

四明叢書

張宗祥



范文正

公年譜

四明張氏約園開雕

序

有宋一代通儒輩出吾鄉諸先生以道學文章傳者往往而有若攻媿樓先生之博洽其尤也然宋初文章實原自穆參軍道學氣節則文正范公爲之魁參軍之傳其後有歐曾文正之學則明復孫先生橫渠張先生首傳之孫先生始以索游秀才謁公公哀其遇爲補學職資餼廩畀使竟學且授以春秋異日孫先生果以春秋教授泰山爲北宋大儒康定初公治兵延州橫渠先生年猶少上書謁公論軍事公語之曰儒者自有名教何

事於兵因勸讀中庸橫渠之學實基於此然則公之學
蓋可知矣且吾聞之公作嚴先生祠堂記其歌之三章
原作先生之德以示李泰伯泰伯易德字爲風字公凝
視領首殆欲下拜所謂一字師也則公之於文事其矜
嚴又如此公事業之見于天下者率能道其彷彿至於
公之學術文章真能知者蓋寡攻媿先生爲公年譜頗
詳密公迂呂夷簡事歐公作墓志述記最真今傳本已
逸蓋出堯夫刪節而此譜記之殊詳則亦宋代黨禁之
史實也余旣取此譜校刊之復刺取公軼行載之篇端

以見事功必原於學術學術必原於師承也至年譜補遺稽諸精四庫存目謂不知何人所作而元天曆戊辰范氏歲寒堂刻本已著之且有八世孫國儁識於年譜補遺之後是爲天曆以前之作可無疑也明萬曆戊申毛一鷺刊范集竟題曰毛一鷺彙編其冒焉可知且毛一鷺魏閹黨也張溥作五人墓碑記所謂大中丞撫吳者又曰吳之民方痛心焉卽斯人也何得以其名汚文正公平讎校所及並發其覆民國二十四年四月後學張壽鏞序

四庫全書提要

范文正公年譜一卷補遺一卷附義莊規矩一卷
年譜一卷宋樓鑰撰鑰字大防鄞縣人隆興元年進士
官至參知政事除資政殿大學士提舉萬壽觀卒諡宣
獻事蹟具宋史本傳補遺一卷不知何人所作前有自
識一條謂取舊譜所未載者見之各年之下所摭前譜
闕遺頗多亦足以互相考證元天曆三年仲淹八世孫
國僞與文正奏議同刊行之其義莊規矩一卷則仲淹
嘗買田置義莊於蘇州以贍其族創立規矩刻之版牘

後其法漸墮治平中其子純仁知襄邑縣奏乞降指揮
下本州許官司受理遂得不廢南渡後其五世孫左司
諫之柔復爲整理續添規式其本爲范氏後人所錄凡
皇祐二年仲淹初定規矩十條又熙寧元豐紹聖元祐
崇寧大觀閒純仁兄弟續增規矩二十八條其慶元二
年十二條則之柔所增定書中稱二相公者謂純仁三
右丞者謂純禮五侍郎者謂純粹皆其子孫之詞也

壽鏞案此書四庫全書存目未著錄也原附義莊規

矩一卷今刻刪之

范文正公年譜序

君子之通常得以行於天下後世者以君子扶樹之也何也舉朝皆君子焉則朝無異道舉國皆君子焉則國無異道舉天下後世皆君子焉則天下後世無異道柰之何不能皆君子也則其道異其道異則其心異其心異則其趨不能以相一矣而可望其道之行哉茲其所以不能不待君子之扶樹也然而君子論道生乎前也率俟後之君子生乎後也率仰前之君子不前後而異揆焉則亦此心之相感乎爾吾友無錫秦公國聲以御

史中丞經略全楚入澧境謁文正公祠卽復道士所侵
祭田已乃屬州刺史葉君邦彥州倅歐陽君崇珍錄公
年譜刻梓藏之祠俾論公之世者考焉美哉乎其爲君
子之道謀也顧公之道非後學所能窺測然其在臺諫
則爲天下靖大奸在邊徼則爲天下禦大敵在宰物之
地則爲天下恢張大治理而表裏始終粹然一出於正
譬則晴空不雲澄江不波人人得而知也伊洛橫渠安
定諸儒皆有稱述而考亭尤極其尊仰其答周益公之
言曰范公心量廣大高明可爲百世師表由是觀之公

於諸儒雖其道詣淺深不敢妄議然公卓然爲有道君子則不當復疑矣中丞公所以拳拳講求公之道者詎容已哉梓刻旣成邦彥輩求予爲序夫中丞公之於范公亦猶范公之於狄李二公也公嘗謁狄梁公仁傑祠退而論撰其行業刻石立之又嘗謁李衛公德裕祠病其湫隘遷於南樓且求其本傳刻梓藏之二公皆唐純臣眾口畢詞以爲君子故公究心焉公而有神其不喟然曰鄉也吾爲狄李二公究心今秦公乃爲我究心乎是可見君子之道同則其心也趨也無或閒然也范公

非爲二公謀也爲二公之道謀也秦公亦非爲范公謀也爲范公之道謀也秦公非循范公之故事也君子之心曠百世而相感無非扶樹此道使其常得以行於天下後世也於戲君子之道一而已矣其不能以相一者道不同也道不同者邪正之所由分也如是而爲正如是而爲邪如是而爲君子如是而非君子不迷其途不爽其趨君子之道不在茲乎君子哉君子哉人病不爲耳公之道具年譜中其行之已者可則而效施之人者可訓而行後進之士論公之世仰公之風而興起焉則

公之道常在天下後世而無恙矣茲刻裨益可勝既乎
哉秦公領茲雄鎮惠治威行合境華夷翕然率俾故能
以其餘閒尙友前哲究心雅道如此論者謂其安攘方
略得於景行文正之功吾固以文正公之道望之則邦
彥輩之求吾序也其奚宜辭正德十二年丁丑夏四月
甲子後學西蜀劉武臣序

范文正公年譜

宋鄞縣樓 鎬大防編次

壽鏞案元天曆二年本文正公集已將年譜刻入邵亭知見傳本書目僅言年譜補遺一卷實誤

公昔遠祖博士范滂爲清詔使裔孫履冰爲唐丞相
鸞臺鳳閣平章事世居河內四世祖上柱國唐懿宗
朝咸通二年任幽州良鄉主簿話書猶存至十一年
遷處州麗水縣丞一支渡江中原亂離不克歸子孫
遂爲中吳人曾祖夢齡仕吳越中吳節度判官宋贈
太師徐國公祖贊時仕吳越九歲童子出身終祕書

監宋贈太師唐國公父墉從錢俶歸宋任武寧軍節

度掌書記武寧軍卽徐州封太師周國公文正公卽書記第

三子也諱仲淹字希文端拱二年己丑八月癸酉二

日丁丑以辛丑時生二歲而孤母夫人謝氏貧無依

再適淄州長山朱氏亦以朱爲姓名說上長白山僧

舍修學醴泉寺內有祠後居南都郡庠五年大通六經之旨

爲文章論說必本於仁義孝弟忠信祥符八年年二

十七歲舉進士禮部選第一遂中乙科初任廣德軍

司理後迎侍母夫人至姑蘇欲還范姓而族人有難

之者公堅請云止欲歸本姓他無所覬始許焉至天
禧元年爲亳州節度推官始奏復范姓其後名益大
位益顯嘗語諸子弟曰吾吳中宗族甚眾於吾固有
親疏然以吾祖宗視之則均是子孫固無親疏也吾
安得不卹其飢寒哉且自祖宗來積德百餘年而始
發於吾得至大官若獨享富貴而不卹宗族異日何
以見祖宗於地下亦何以入家廟乎故恩例俸賜嘗
均族人盡以俸餘買田於蘇州號曰義莊贍養宗族
無閒親疏日有食歲有衣嫁娶凶葬咸有贍給

錢公輔爲

撰義田記趙雍公爲人外和內剛樂善汎愛喪母時書石在本祠

尙貧終身非賓客食不重肉臨財樂施意豁如也及退而視其私妻子僅給衣食其於富貴貧賤毀譽歡戚不一動其心而慨然有志於天下常自誦曰士當先天下之憂而憂後天下之樂而樂也其事上遇人一以自信不擇利害爲趨捨凡有所爲必盡其方曰爲之自我者當如是其成與否有不在我者雖聖賢不能必吾豈苟哉公爲政所至民多立祠畫像其行已臨事自山林處士里閭田野之人外至夷狄莫不